



B A B
P E R T A M A

BAB I

PENDAHULUAN

1.1 Latarbelakang Masalah

Kesedaran umat Islam terhadap agamanya telah mula ketara dewasa ini. Di mana-mana sahaja masyarakat memperkatakan tentang kebangkitan Islam. Kebangkitan ini lahir ekoran dari kelancaran perjalanan Dakwah Islamiyyah itu sendiri.

Media cetak merupakan salah satu alat penyebaran dakwah yang berkesan. Berbagai makalah, risalah dan buku-buku bercorak keislaman dapat diterbitkan melaluinya. Melalui sumber ini, fikrah Islamiyyah dapat disalurkan sepenuhnya ke jiwa-jiwa umat Islam sehingga mereka dapat membezakan antara yang haq dan bātil seterusnya dapat menolak segala bentuk penyelewengan yang ditimbulkan oleh musuh-musuh Islam yang ingin memesungkan aqidah umat Islam.

Umat Islām kini sudah mula mengorak langkah mempertingkatkan keimanan terhadap Allah. AlQurān dan Sunnah sebagai uratnadi Islam sudah mula diperdalami dan dihayati. AlQuran merupakan kitabullah yang memerlukan penjelasan dan penerangan dari Rasulullah s.a.w. Firman Allah s.w.t.¹

¹Surah An-Nahl, ayat 44

وَأَنْزَلْنَا إِلَيْكَ الذِّكْرَ لِتُبَيِّنَ لِلنَّاسِ مَا نُزِّلَ إِلَيْهِمْ وَلَعَلَّهُمْ يَتَفَكَّرُونَ

Maksudnya:

"Kami turunkan kepada kamu Al-Qurān, agar kamu menerangkan kepada umat manusia apa yang telah diturunkan kepada mereka (perintah - perintah, larangan-larangan, aturan - aturan dan lainnya) supaya mereka berfikir."

Penerangan dan penjelasan RasūlulLāh s.a.w. ini digambarkan perbuatan, perkataan atau persetujuan baginda s.a.w. terhadap perkataan dan perbuatan para sahabat. semuanya ini diistilahkan dengan sunnah atau hadīth.

Islam adalah agama yang mengatur kehidupan manusia berpendukan al-Qur'ān dan hadīth. Ia menjamin keamanan dan kesejahteraan sejagat. Menyedari akan kepentingan al-Sunnah ini, perlulah bagi umat Islam seluruhnya memperdalaminya dan menghayatinya malah berusaha bagi mempertahankannya kerana dewasa ini terdapat golongan anti hadīth yang menafikan peranan hadīth sebagai sumber perundangan Islam. Fahaman mereka ini mencabar aqīdah umat Islam dan telah menular di mana mana.

Adalah menjadi kewajipan umat Islam kini mencari jalan untuk menangani permasalahan ini agar ianya dapat dihapuskan. Sebagai salah satu caranya ialah dengan memperbanyakkan penulisan-penulisan hadīth untuk disebar kepada umat Islam bagi menolak dan menyanggah fahaman

yang menyeleweng ini. Umat Islam perlu diperjelaskan tentang kebenaran hadīth serta kesahihannya.

Lantaran itu, penulis merasakan perlu membuat penyelidikan tentang sejauhmanakah usaha pelbagai pihak khususnya bahagian penerbitan dalam rangka usaha memperluaskan penyebaran hadīth. Apakah masalah-masalah yang dihadapi oleh penerbit dan bagaimanakah sambutan masyarakat terhadapnya.

1.2 Skop pengkajian

Membincangkan tentang usaha-usaha penerbitan buku-buku hadīth di Malaysia merupakan kupasan dan perbincangan yang luas dan meliputi semua bahagian penerbitan. Oleh itu penulis akan membataskan perbincangan ini terhadap bahagian penerbitan di sekitar Wilayah Persekutuan dan beberapa tempat di negeri lain seperti Bahagian Hal Ehwal Islam di Jabatan Perdana Menteri, Yayasan Dakwah Islamiyah, Yayasan Islam Terengganu, Pustaka Aman Press, D i a n DarulNaim dan sebagainya.

Pembatasan ini dibuat untuk memudahkan penulis dalam membuat pengkajian. Di samping itu penulis juga cuba meninjau permasalahan yang ada dan peranan yang dimainkan oleh pihak penerbit b a g i menyelesaikan permasalahan tersebut bagi melahirkan umat Islam yang benar-benar memahami ajaran Islam khususnya hadīth.

1.3 Pengertian Tajuk

Tajuk yang dipilih oleh penulis dalam latihan ilmiah ini ialah 'Usaha-usaha Penerbitan Hadīth di Malaysia'. Sebelum penulis meneruskan perbincangan lebih lanjut, penulis akan menghuraikan pengertian tajuk secara mendalam.

Usaha ialah daya upaya, ikhtiar, kegiatan, perbuatan untuk menyampaikan sesuatu maksud² atau kegiatan dengan mengerahkan tenaga mental dan fizikal dalam mencapai sesuatu maksud.³ Penerbitan ialah kata terbitan dari 'terbit' yang bererti keluar atau siap untuk dicetak dan diedarkan. Penerbitan ialah urusan atau pekerjaan menerbitkan sesuatu makalah, risalah, buku-buku dan sebagainya.⁴

Hadīth merupakan sumber kedua dalam shari'at Islam selepas al-Qur'an. Ini dibuktikan oleh Sirah RasūlulLāh s.a.w. dan al-Qur'an sendiri. Firman Allah s.w.t,

يَا أَيُّهَا الَّذِينَ آمَنُوا أَطِيعُوا اللَّهَ وَأَطِيعُوا الرَّسُولَ وَأُولِي الْأَمْرِ مِنْكُمْ فَإِنْ تَنَازَعْتُمْ فِي شَيْءٍ فَرُدُّوهُ إِلَى اللَّهِ وَالرَّسُولِ إِنْ كُنْتُمْ تُرْمِنُونَ بِاللَّهِ وَالْيَوْمِ الْآخِرِ،

²Dr. Teuku Iskandar, Kamus Dewan, Dewan Bahasa Pustaka, Kementerian Pelajaran Kuala Lumpur, 1970, m.s. 1331.

³W.J.S Poerwadarminta, Kamus Umum Bahasa Indonesia, Balai Pustaka Jakarta, 1961, m.s.

⁴Op.cit., Teuku Iskandar, m.s. 1241.

Maksudnya:

"Wahai mereka yang beriman, hendaklah kamu taat kepada Allāh dan hendaklah kamu taat kepada Rasūl dan yang mempunyai kekuasaan (أولى الأمر) dari kalangan kamu (dari kalangan orang-orang yang beriman) dan jika kamu berselisihan di dalam sesuatu perkara hendaklah kamu rujukkan kepada Allāh dan Rasūl jika kamu beriman dengan Allāh dan hari akhirat".⁵

RasūlulLāh s.a.w sendiri pernah menggesa umatnya supaya mengambil al-Qurān dan Hadīth sebagai teras bagi 'aqīdah yang menjamin keselamatan umat sejagat. Sabdanya dalam sebuah hadith sahīh,

تركت فيكم أمرين لن تضلوا ما مسكتم بهما : كتاب الله
وسنة نبيه .

Maksudnya:

"Aku tinggalkan kepada kamu dua perkara, kamu tidak akan sesat selama-lamanya selagi kamu berpegang dengan kedua-duanya iaitu kitabūLāh (al- Qur'an) dan Sunnah NabiNya (Hadīth)".⁶

Penulis tidak bermaksud untuk membentangkan kesemua nas al-Qur'an dan lainnya yang berkaitan dengan hadīth melainkan sekadar menerangkan dalil kepada pengertian hadīth.

Manakala Malaysia ialah tempat di mana penulis membuat penyelidikan dengan memfokuskan kepada bahagian percetakan yang terdapat di Wilayah Persekutuan dan beberapa tempat di negeri lain.

⁵Surah an-Nisā', ayat 59

⁶Riwayat Bukhārī Muslim serta beberapa 'ulama hadīth. Lihat Mālik bin Anas, al-Muwattā', Muhammad Fu'ad Abd al-Bāqī, Misr: 'Īsa al-Babī al-Halabī. 1951, m.s. 899.

Rumusan Masalah

Berdasarkan pengertian tajuk yang telah dibentangkan di atas dapatlah dirumuskan beberapa noktah penting seperti berikut:

1. Sejauhmanakah usaha-usaha bahagian penerbitan mengeluarkan buku-buku hadīth.
2. Mengenali tokoh-tokoh yang memberi sumbangan.
3. Apakah masalah -masalah yang dihadapi dalam usaha menerbitkannya.
4. Sambutan masyarakat umum terhadap hadīth.

Penulis akan menghuraikannya dengan lebih terperinci dalam bab keempat.

1.4 Tujuan Penyelidikan

Setiap penyelidikan yang dijalankan pasti mempunyai beberapa tujuan tertentu. Dalam hal ini, tujuan utama penulis membuat penyelidikan ini ialah seperti berikut,

1. Kajian ilmiah ini ditulis sebagai memenuhi syarat untuk mendapat Ijazah Sarjana Muda Usūluddin seperti yang telah ditetapkan oleh fakulti kepada pelajartahun akhir.
2. Penulis bertujuan untuk mengetahui tentang usaha-usaha yang telah dijalankan oleh pihak penerbitan di Malaysia dalam mengeluarkan hadīth.

3. Untuk mengenalpasti pihak penerbitan yang memainkan peranan penting dalam menerbitkan hadīth.
4. Mengetahui permasalahan semasa yang dihadapi oleh penerbit.
5. Memberi idea-idea baru untuk dilaksanakan oleh pihak penerbit dalam menghadapi cabaran semasa seterusnya bagi menjamin sambutan yang baik oleh masyarakat seluruhnya.
6. Memberi kesedaran kepada masyarakat Islam tentang pentingnya hadīth untuk diperdalami dan dihayati.
7. Untuk mengenali tokoh-tokoh hadīth tempatan bagi mengenang jasa mereka terhadap penyebaran Da'wah Islāmiyyah amnya dan penyebaran hadīth khususnya.
8. Menambahkan bahan-bahan penulisan dan bacaan berbentuk Islam khususnya mengenai hadīth.
9. Akhirnya, untuk memberikan pengalaman baru kepada penulis seterusnya sebagai perintis jalan kepada bentuk kajian lain di masa akan datang.

1.5 Metodologi

Dalam rangka penulisan latihan ilmiah ini, penulis telah menggunakan beberapa metod. Metod-metod itu adalah seperti berikut:

1. Metod Pengumpulan Data
2. Metod Analisa Data dan Penulisan

1.5.1 Metode Pengumpulan Data

Dalam usaha untuk mendapatkan segala data dan fakta yang diperlukan, penulis telah menggunakan metod-metod berikut:

- a. Metod Historis
- b. Metod Dokumentasi
- c. Metod Interview
- d. Metod Sosialistik

1.5.2 Metod Analisis Data dan Penulisan

Dalam membuat analisa data dan penulisan, penulis menggunakan beberapa metod tertentu. Ini bertujuan supaya dapat dibuat penulisan yang baik dan penulisan yang baik, teratur dan tepat. Di antara metod metod yang digunakan:

- a. Metod Deduktif
- b. Metod Induktif
- c. Metod Komparatif

Rumusan tentang metod-metod ini akan penulis jelaskan dalam bab berikut.

1.6 Susunan Penulisan

Dalam kajian ini penulis telah membahagikan kepada beberapa bab yang tertentu yang bertujuan supaya dapat membuat analisa data dan penulisan yang baik dan bermutu.

Dalam bab I, penulis telah memperkenalkan l a t a r belakang masalah kajian diikuti dengan penjelasan terhadap pengertian tajuk. Daripada pengertian tersebut, penulis merumuskan masalah yang akan dibahaskan dalam kajian ilmiah ini. Penulis juga membentangkan tujuan penulisan, metodologi secara umum dan susunan penulisan yang menyentuh tentang bab-bab yang akan dibentangkan.

Dalam bab II, penulis menghuraikan a p a yang dijadikan landasan dalam penulisan ini. Di sini dinyatakan tentang peringkat penulisan hadīth dari zaman awal Islam hingga ke zaman mutakhir. Kitab-kitab hadīth serta tokoh-tokohnya yang termashyur dalam setiap peringkat juga diperkenalkan.

Dalam bab III, penulis membentangkan tentang metodologi dengan membahagikan kepada dua aspek c a r a pengumpulan data dan fakta seterusnya cara membuat penganalisaan dan penulisan setelah fakta dan data terkumpul.

Dalam bab IV, penulis menghurai, mengolah dan menyusun isi data dan fakta yang telah terkumpul bagi menghasilkan penulisan yang menepati syarat-syarat pengkajian ilmiah ini. Penulis meninjau sejauh mana sambutan dan keperluan masyarakat terhadap buku-buku h a d i t h melalui soal selidik yang telah diedarkan kepada bahagian penerbitan samada syarikat persendirian atau agensi kerajaan. Penulis juga memaparkan tentang usaha-usaha yang telah dijalankan oleh pihak penerbit tersebut dalam menerbitkan hadīth.

Dalam bab V pula, penulis membuat rumusan dan kesimpulan serta memberi saranan-saranan berdasarkan perbincangan yang telah dibuat dalam bab IV. Saranan-saranan ini dibuat sebagai langkah untuk menyelesaikan atau memperbaiki apa yang berlaku.